

**Date – 18/11/2025**

**Time - 18:30 -18:40Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES ( EVENING )**

1. Dampa bial by-election a MLA atana thlan tlin Dr. R. Lalthangliana, MNF sr. vice president chu Assembly Speaker in rinawmna thu tiamtirin MLA atan a la lut.
2. Chief Minister Pu Lalduhoman Adviser to CM Pu TBC Lalvenchhunga, MLA-in Adviser to Chief Minister a nihna atanga banna a thehluh chu a pawm loh thu a sawi.
3. Larsap General (Retd) Vijay Kumar Singh-an Cooperative Conclave 2025 Aizawla neih chu a hmanpui.
4. President Draupadi Murmu-i chuan tuihna humhalh leh venhim kawngah thawhhona tha neih a pawimawh thu a sawi.



## MLA

Dampa bial by-election a MLA atana thlan tlin Dr. R. Lalthangliana, MNF sr. vice president chu Assembly Speaker Pu Lalbiakzama'n rinawmna thu tiamtirin MLA atan a la lut.

Lakluh inkhawm hi Assembly Annexe Conference Hall-ah neih a ni a, Speaker Pu Lalbiakzama chuan Dr R Lalthangliana chu Mizoram Legislative Assembly 9-naa legislator tha tak ni turin duhsak a hlan nghal a ni.

Dr R Lalthangliana hi tun by election nen chhiar telin MNF ticket-in MLA atan vawi 7 thlan tlin a ni tawh a - kum 1989 khan a vawi khat nan Lunglei North bialah MLA atan thlan tlin niin, Lunglei North bialah vêk hian kum 1993, 1998 leh 2003 khan thlan tlin leh a ni. Kum 2008 khan Lunglei West bialah a tling leh a, kum 2018 khan South Tuipui bialah thlan tlin a ni tawh bawk.

Kum 2023-a 9th Mizoram Legislative Assembly inthlanpuiah khan South Tuipui bialah MNF ticket in a ding leh a, thlan tlin ni lo mahse Dampa Bial by-election ah thlan tlin niin, MLA atana thlan tlin a nih vawi 7-na a ni.



## CM

Chief Minister Pu Lalduhoman Adviser to CM Pu TBC Lalvenchhunga, MLA-in Adviser to Chief Minister a nihna atanga banna a thehluh chu a pawm loh thu a sawi.

Vawiina MLA atana Dr. R Lalthangliana lakluh inkhawm zawhah thuthar thehdarhtuten Chief Minister chu Adviser to CM Pu TBC Lalvenchhunga banna a thehlut nia sawi chu a dik leh dik loh an lo zawt a, Chief Minister chuan a banna chu a pawm loh thu a sawi a ni.

Pu TBC Lalvenchhunga hi Aizawl West-I bialtu MLA a ni a; Chief Minister in adviser 5 a neih zinga 1 niin, Finance chungchanga Chief Minister puitu, Adviser to CM (Finance) a ni mek a ni.

Hetihlai hian, Adviser to CM Pu Ginzalala leh MLA Pu T Lalhlipua te chu PWD Minister Pu H Vanlalhlana pui tura ruat an ni a,

Hemi chungchanga sorkar hriattirna chu vawiin khan Chief Secy Pu Khilli Ram Meena-an a tichhuak a, PWD hna hrang hrang ah MLA 2 te hian PWD Minister chu an pui dawn a ni.



## **MEDIA WORKSHOP “VARTALAP”**

Information & Public Relations Minister Pu B. Lalchhanzova'n vawiin khan DIPR Auditorium ah Ministry of information and Broadcasting hnuai Press Information Bureau, buatsaih, One Day Media Conclave 'Vartalap' - thupui hrang hrang zirhona hun a hmanpui.

He workshop-ah hian GST dan thar chungchang leh National Song kumina kum 150 tling Vande Mataram bakah Adi Karmayogi Abhiyaan chungchang zir ho a ni a, Pu B. Lalchhanzova chuan Vartalap chu sawrkar laipuiin hnam inpumkhatna atana a hmalakna kawngah thil pawimawh tak a ni a ti a, National Song Vande Mataram chu India mipuite min phuar khawmtu leh ram dang hriat phaka India mipuite chawisangtu a ni a ti a, Vande Mataram chuan India hmasawna a thlen tih sawiin ram inpumkhatna atan a pawimawh takzet a ti a, Ram leh Hnam inpumkhatna chu khawvel thang mekah ngaih pawimawh a hlawh zel dawn tih a sawi.

I & PR leh Printing & Stationary Department changtu Minister Pu B. Lalchhanzova chuan GST dan thar chu a tirah huphurhawm viauin lang mahse mitin nunphung ziaawm na tur zawk a ni a ti a, Mizoram ei leh bar dinhmun thlak danglam thei ani tih sawiin hei hian hmasawna lian zawk a thlen dawn a ti a, Mipui mimir khawsak harsa thlengin a tha zawngin nghawng a nei tih sawiin mipuite hmasawna a thlen tih a sawi.

Taxation Commissioner Pu HK Lalhawnghiana chuan Mizoram chhiah lakkhawm chuan ziaawm lam a pan zel tih sawiin mipuite an harh thar chho mek a ti a, GST dan thar chuan Mizoram eizawna kawngah hmasawna a thlen dawn tih sawiin Chhiah lak dan mumal zawk buaipui mek ani a ti baw.

Vawiina hun hmanah hian PIB staff, AIR staff, Doordarshan staff te leh MZU leh ICFAI zirlaite an tel a, heng bakah hian thuthar lakhawmtute leh sawm bik mi pawimawhte an tel baw.

## AR RAM ADVISORY COMT

Chief Minister Pu Lalduhoma kaihhruaiin Aizawla Assam Rifle chhuahsan ram hman zui dan tur ngaihtuahtu Advisory Committee chu a tum 4 nan an thukhawm.

Advisory Committee hian AR ram chhuahsana mimal leh pawl, pass neite chu sorkara hlan tura an ngen angin mi thenkhat chuan an ram hi sorkarah an hlanlet tawh tih tarlan a ni a. Assam Rifles Biak in hmun bik hi YMA Writ Petition chhunga mi nia sawi a nih tak avangin Advisory Committee hian Court thu hi vawiin thlengin an la ngaichang a ni.

Canteen kuala Hari Mandir humhalh leh hman zui theiha dah tura Mizoram Gorkha Sanchalan Samiti, Bazar Branch ten Prime Minister hnena lehkha an lo thehluh tawh chu hnukkir tura ngen turin NGO Coordination Committee ruat an ni a, anni chuan an ngenna in rah tha a chhuah ngei an beisei thu an tarlang a.

Tun hnuah chuan AR ram chhuahsan hmunhma leh building hman dilna lam chi chu committee-ah chhawpchhuah tawh rih loh ni se an ti a. An thu lo tihtluk tawh anga hmasawna hnathawh turte chu a remchan danin sorkarin lo thawk zui tawh se, an tih bakah a hmunhma tihhmasawna hna Nodal Department atan UD & PA chu an ruat a ni.



## COOPERATIVE CONCLAVE

Larsap, General (Retd) Vijay Kumar Singh-an vawiin khan International Year of Cooperatives 2025 puala NABARD Mizoram Regional Office-in Cooperative Conclave 2025, Hotel Regency Conference Hall, Aizawla neih chu a hmanpui.

Larsap chuan khawtlang thuamchak leh tihhmasawn kawnga Cooperative-te hmalakna fakawm a tih thu sawiin, Mizo khawtlang chu tunhma atang tawha thawhhona tha nei a nih avangin Mizoramah Cooperative hlawhtlin lohna chhan tur a awm loh thu a sawi a. Hmanrua, inkaihhraina leh hmalakna enzuina tha bakah tun aia taima lehzuala tanlakna hmangin Cooperation harhtharna hlawhtling tak a kalpui thei a ni, a ti.

Cooperation Secy Pu Udit Prakash Rai a chuan her hunah hian thusawiin Cooperative sector tana 'State Cooperative Policy' siam chu peihfel thuai a nih dawn thu a sawi a. Right of First Refusal kaltlangin MPACS-te thliarfel an ni tih sawiin, federation dang - MULCO, PIGFED, POULTRYFED leh ZOFISHFED-te tanpuina tur pawh ruahmannaah hian telh a ni, a ti a. Ministry of Cooperation kalphung thar hnuaiiah digitisation-in nasa taka hma a sawn thu pawh tarlangin, tun dinhmunah PACS 24 chu online-a kalpui a ni tawh a, kum 2027-ah chuan PACS zawng zawng computerise vek turin chak taka hmalak mek a ni, a ti bawk.



## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



## CHAMPHAI UNITY MARCH

Sardar Vallabhbhai Patel piancham kum 150-na pual Sardar@150 pualin Unity March chu Champhai ah vawiin khan buatsaih a ni a,

Champhai Bawrhsap Pu Mohammad Aaquib chuan Sardar Vallabhbhai Patel India tana a hnathawh ropui tak te sawiin India ram suihkhawmtu pawimawh tak a ni tih a sawi a, inlungualna leh inunauna chhawm nung turin kalkhawmte a chah a ni.

Kawngzawhnaah hian sikul naupang 500 vel an tel a, Circuit House thleng kalin kalkawngah faina beihpui nei pahin bawlhhlawh an chhar a ni.



## JANJATIYA GAURAV DIWAS

National Tribal Day- Janjatiya Gaurav Divas vawi 150-na pualin Khadi and Village Industries Commission (KVIC), Mizoram State Office chuan MINECO Khatlaah Prime Minister's Employment Generation Programme (PMEGP) chungchang inhrilhhriatna leh lawmna hun a buatsaih.

He hunin a tum ber chu PMEGP leh a hnuaia hamthatna hmuh theihthe chungchang zau zawka mipui hnena hriattir a ni a. Janjatiya Gaurav Divas pualin Birsa Munda, tribal freedom fighter chanchin ngaihthlak a ni bawk.



## MPCC

Mizoram Pradesh Congress Committee (MPCC) PAC member Pu TT Zothansanga chuan ZPM sorkarin Mizorama kawlpheha siam chhuahna Small Hydrel Project 8-te company enkawltir a tum chu ram leh mipui tan thil pawl tak a ni a ti a, ZPM sorkarin kawlpheha siam chhuah lamah hnu hma a la neih ve loh thu a sawi.

Vawiin khan Aizawlah thuthar thehdarhtute kawmin Pu TT Zothansanga chuan Restricted emaw, tender pangngai emaw pawh nise Small Hydrel Project-te hi tihral loh hrim hrim nise tih hi Mizoram a thatpui tur zawk nia ngaiin MPCC chuan ZPM sorkar hotute hi outsource lo hram turin an ngen a ni, a ti.

Kawlpheha hi MNF ten compensation zâwngin an lo hlawkpui tawh thin nia sawiin Pu TT Zothansanga chuan, ZPM hian level sang takin an hlawkpui ve mai angem tih chu an zawhna a nih thu a sawi a, Congress sorkar chuan ramro an siam thin a, MNF sorkarin an tichingpen a, ZPM sorkarin a hralhna tur an zawng thung tih a sawi bawk a ni.

Pu TT Zothansanga chuan ZPM sorkar hian Small Hydrel Project-te hi Kundan Green Pvt Ltd hnenah outsouce tura hlan tumin kum 2024 tir lam khan hma an lo lak tawh thu leh MPCC President Pu Lal Thanzara'n a sawichhuah hnuah tender hmanga a enkawltu tur zawnna an buaipui leh hnahnawh tih a sawi a.

Congress Party chuan sorkarna an siam lai, kum 22 chhungin kawlpheha megawatt 83 point 05 pe chhuak thei an din thu te, PC sorkarin kum 5 chhungin megawatt 2 point 05 pe chhuak thei an din thu leh MNF sorkarin kum 17 chhungin megawatt 15 point 5 siam chhuak thei an din thu sawiin, tuna ZPM sorkar hi chuan kawlpheha lamah hnuhma an la neih loh thu a sawi bawk.



## NATIONAL WATER AWARD

President Draupadi Murmu-i chuan tuihna humhalh leh venhim kawngah thawhhona tha neih a pawimawh thu a sawi. Vawiina New Delhi-a National Water Awards 2024 vawi 6-na a semnaah he thu hi sawiin Pi Murmui chuan sik leh sa inthlak nasain tuihna insiamkual dan nasa takin a nghawng thu a sawi a. Mihring pung chak zelah tui mamawhna a san avangin mitinin mamawh khawp tui thianghlim an dawn chu ram tana thil pawimawh a ni a ti bawk.

Vawiin inkhawmah hian a hmasa ber atan President hian Jal Sanchay Jan Bhagidari Award a sem bawk a ni.

Union Minister of Jal Shakti C.R Patil, Union Minister of state for Jal Shakti V. Somanna leh Raj Bhushan Choudhary te pawh he hunah hian an tel a. Category hrang hrang ah award 46 sem chhuang a ni a. Best District, Best Village Panchayat, Best Urban Local Body, Best Institution, Best School,leh Best Individual te lawmmawn pek an ni a. State category ah Maharashtra chu ti tha berin pakhatna dinhmum a hauh a. Gujarat leh Haryana ten an dawt a ni.

